

# خَطِ سِوَمِ يُوَحَنَّا

## پیشگفتار

نوشته کُننده امزی خطِ ام یُوَحَنَّا باچه زیدی آسته و ای خطِ ره بلده غایوس رهبرِ جماعتِ ایماندارا نوشته کده. دَ امزی خطِ یُوَحَنَّا از غایوس تعریف-و-توصیف مونه و بخاطرِ کومک و تشویق شی تَشْکُری مونه. مگم یگ نفرِ دیگه ره که نام شی دیوترفیس آسته سرزنش مونه و غایوس ره دَ باره ازو خبردار مونه.

## فهرستِ عنوانها

دُعا و سلام (آیه ۱-۴)

قدردانی از غایوس (۵-۸)

شکایت از دیوترفیس (۹-۱۰)

نصیحتِ یُوَحَنَّا (۱۱-۱۲)

سلامِ آخری (۱۳-۱۵)

<sup>۱</sup> از طرفِ بزرگِ جماعت، بلده غایوسِ عزیز که او ره دَ راستی دوست دَرُم.

<sup>۲</sup> دوستِ عزیز، ما دُعا مُونُم که از هر نگاه کامیاب و تندرُست بشی امو رقم که روح-و-روان تو سالم آسته. <sup>۳</sup> ما غدر خوشحال شُدُم و ختیکه بعضی برارو آمده دَ باره تو شاهدی دَد که تو دَ حقیقت وفادار آستی و مُطابقِ راستی-و-حقیقت رفتار مُوکنی. <sup>۴</sup> ازی کده هیچ خوشی بلده مه بزرگتر نیسته که بشنوم که بچکیچای مه دَ مُطابقِ حقیقت رفتار مُونه.

## قدردانی از غایوس

<sup>۵</sup> دوستِ عزیز، دَ هر چیزی که بلده برارونِ ایماندار انجام میدی، وفاداری خور ثابت مُوکنی، حتی اگه اونا قد از تو ناشنخته ام بشه. <sup>۶</sup> اونا دَ باره مُحَبَّت تو دَ حُضورِ جماعتِ ایماندارا شاهدی دَد. اگه اونا ره بطورِ خُدا پسندانه دَ سفرِ ریی کنی، کارِ نیکِ مونی، <sup>۷</sup> چون اونا بخاطرِ نامِ مسیحِ بلده خدمت کدو بُر شده و هیچ رقم کومک ره از مردُمای غیرِ ایماندار قبول نکده. <sup>۸</sup> پس بلده از مو فرض آسته که از ای رقم آدما پذیرایی کنی تا قد ازوا دَ اعلانِ کدونِ حقیقتِ شریگ شنی.

## شکایت از دیوترفیس

<sup>۹</sup> ما یگ خطِ بلده جماعتِ ایماندارا نوشته کدیم، مگم دیوترفیس که خوش دره نفرِ اوّل  
بشه توره ازمو ره قبول نموکنه. <sup>۱۰</sup> پس اگه بییم، از کارای که او انجام میدیه یاد آوری  
مونم، چون او د باره ازمو از روی کینه تورای پوچ-و-ناسزا موگیه و د امزی کارا ام  
قناعت نکهده، بلکه از برارون ناشنخته ام پذیرایی نموکنه و کسای ام که میخایه پذیرایی  
کنه، اونا ره منع موکنه. اگه از آید شی نشد، اونا ره از جماعتِ ایماندارا بر مونه.

## نصیحتِ یوحنا

<sup>۱۱</sup> دوستِ عزیز، از چیزای بد سرمشق نگیر، بلکه از چیزای خوب. هر کسی که کارِ خوب  
مونه، از خدا آسته، و له هر کسی که کارِ بد مونه او خدا ره ندیده. <sup>۱۲</sup> پگِ مردم د باره  
خوبی دیمیتریوس شاهدی میدیه، حتی خودِ حقیقت ام. مو ام د باره ازو شاهدی میدی و  
شمو میدنید که شاهدی ازمو راست آسته.

## سلامِ آخری

<sup>۱۳</sup> ما غدر چیزا درم که بلده تو نوشته کنم، مگم نمیخایم که قد قلم و سیاهی د روی قاغد  
نوشته کنم، <sup>۱۴</sup> مگم امید درم که تو ره د زودی پنگرم و مو روی د روی توره بگی.

١٥ آسایش-و-آرامش نصیب تو شنه. دوستا سلام های خوره بلده تو ریی مونه. دوستا ره د  
اونجی ام نام گرفته سلام بگی.

---

سوال دارید؟ +1 807.700.6090

afghanbibles.org © آزرگی

Copyrighted material not for reprint/publishing purposes.